



# SELP GAVMAN — YES NEM NA FLAK — NO

Selek Komiti bilong Konstitusional Development i kirapim lukluk raun bilong en dispela mun bilong painimaut ol pipel i ting wanem long selp gavman na sampela senis long ol lo.

Wanpela hap bilong komiti i kirap go long Bougainville. Ol man bilong Kieta na Buin i tokim komiti ol i no laik bekim tok. Pastaim gavman i mas orait long ol man bilong Bougainville i ken vot ol i laik stap wantaim Niugini o nogat.

Kaunsila Joshua Mantoro bilong Bana lokal gavman kaunsil i tok ol man i skul pinis ol i laikim kain vot olsem. Ol man bilong ples ol i no laik.

Mista Paul Lapun, memba bilong Haus Asembli, i tok ol pipel bilong em i laikim dispela vot na ol i laikim selp gavman tu long 1972.

Ol pipel bilong hap bilong Bougainville i lukim Not i tok ol i laikim selp gavman long 1972. Na sampela i tok, maski ol i laikim dispela yia yet.

Wanpela hetman bilong viles, nem bilong em Gerard Bolai, i tok em i maus bilong 5000 manmeri bilong hap bilong Leme-goa. Ol yet i laik Niugini i kisim selp gavman nau tasol. Em i tok gavman i no mas westim taim long wanem ol man bilong Hailans tasol i no laik. Ol lida bilong ol ples i tok ol pipel

bilong ol i tingting namba wan long selp gavman tasol.

Tenpela man i kirap tok, pasin bilong ol rijonal memba i mas raus. Ol i no laikim tu nupela plak long wanem i no gat wanpela liklik samting long en i makim Bougainville.

Planti spika na tokman bilong Bougainville i laikim gavman presiden long wanem em i strong moa na i ken pasim mobeta olgeta pipel long wanpela kantri.

Taim wanpela hap bilong Selek Komiti i stap long Bougainville, narapela hap i stap long Manus Ailan. Ol spika long Lorengau i laikim 1972 olsem yia bilong selp gavman i kamap. Tupela tasol i no laik, tupela i tok yumi mas wet inap long taim i gat moa man i winim skul pinis.

Wanpela spika i tok ol waitman insait long Haus Asembli i

ting long bisnis bilong ol na i givim het long ol Hailans memba bai ol i no ken laikim selp gavman i kam hariap.

Miting tu i no laikim tru nupela nem na nupela plak. Bihain komiti i go lukim narapela hap bilong Manus na 170 man bilong ples i tokim komiti Niugini i no redi yet long selp gavman. Ol i tok yumi no go het inap yet.

Ol tu i no laikim nem Pagini na nupela plak. Wanpela hetman i tok em i laikim plak bilong Australia tasol i ken stap; dispela plak yet em i mak bilong go het.

Wanpela kanu pulap long ol man bilong ol ailan i kam bihaintaim tumas na ol i taitim bun na bihainim pinas bilong selek komiti tripela aua... inap ol i bungim em. Bihain ol i sindaun long pinas na Kibung inap wan aua.

Taim Komiti i kamap long Nu Ailan, 300 manmeri long Kavieng i tok ol i no laikim tru selp gavman i kam hariap. Mista Perry Kivan, tokman bilong Yunaitet Politikal Sosaiti, i tok selp gavman i mas kam long yia 1975. Hia tu planti man tumas i no laikim nupela nem Pagini na nupela plak.

# PAS I KAM LONG EDITA

Sapos yu gat tok yu raitim sotpela tasol. Sapos yu raitim longpela bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela prinim nem bilong yu tru, orait yu raitim arapela nem bilong yu tu.

## Samting Nogut Tumas

Dia Edita.- Mi gat wankain tingting tru olsem tok bilong William Barnabas bilong Goroka. Mi bin ritim dispela tok bilong "Sotpela Sket!"

Mi lukim wanpela tok bilong William i kranki liklik. Em i tok dispela sotpela sket em i samting bilong ol waitpela meri na long ol tumbuna bilong ol. Nogat tru. Ol tumbuna meri bilong ol waitskin i no bin save long dispela kain sket i sotpela. Long taim bilong tumbuna sapos sampela meri i traim long putim dispela kain klos bai ol i kotim ol tru. Inap long 1965 mi no bin lukim wanpela waitskin meri i putim dispela kain sotpela sket. Dispela pasin ating i kamap nau tasol.

## Amamas Long Plak

Dia Edita.- Mi wanpela skulboi bilong Ulupu Katolik Misin Skul. Mi laik tok amamas long dispela nupela plak bilong Pagini. Mi wantaim ol wanskul bilong mi i tok olsem em i gutpela plak bilong mipela long Pagini. Mipela i ting mipela i go tokim ol papamama bilong mipela bai ol tu bai i amamas long dispela plak. Long wanem ol i lukim kundu spia na kumul. Dispela ol samting i mekim ol pipel i laikim tru dispela plak.

Albert Glasembi,  
Ulupu.

Mi tu mi ting dispela pasin bilong ol meri i putim sotpela sket em i samting nogut tumas. Ating ol i gat wanem tingting na ol i mekim? Ol i no gat sem? Ating ol i gris long ai bilong man tasol.

Mi save tru dispela pasin i opim dua bilong mekim bel bilong ol man i kirap nogut, na pulim tingting bilong ol i go long brukim marit na lo bilong God.

Mi ting tu i gutpela sapos Haus Asembli i putim lo i tok, ol meri i no ken putim dispela sotpela sket.

Gerald Bustin.  
Mendi

## Soldia i Kros

Dia Edita.- Bilong wanem ol haiskul man na meri i tok bilas long ami bilong ol long Papua na Nu Gini? Wanpela taim mi bin ritim wanpela pas bilong ol haiskul man na meri.

Ol i rait na tok olsem watpo ol soldia bilong Papua na Nu Gini i save helpim ol kanaka bilong yumi? Ol soldia i save giaman long mekim sampela wok olsem bris, ples balus, rot, haus, na helpim ol sik pipel. Dispela ol toktok i kam long T.P.N.G. Niuspepa.

Ol i tok, mipela ol haiskul i no laik ol soldia i mekim olsem long ol kanaka bilong yumi. Tasol mi Francis Olding i ting yupela i mekim rabis toktok. Yupela i ting ami bilong

Dia Edita.- Mi laik autim tingting bilong mi yet, bai ol arapela man i ken harim na tingim. Tingting bilong mi i olsem: insait long Niugini sampela man i go skul standet 2,3, na 4. Bihain ol i lusim skul na stap long ples. Sampela i no gat rot bilong holim wok o i go long bikpela skul tu. Na sampela i skul long klas skul tasol na ol i save long tok pisin tasol.

Na sampela i no save long Inglis na holim bikpela wok tu. Olsem na ol man bilong Haus Asembli na ol arapela man tu i ken tingting na kirapim wanpela Yunivesiti long tok pisin. Bambai ol man i save long tok pisin i ken go long dispela skul na lainim long mekim sampela bikpela wok bilong helpim kantri bilong yumi i go het. Ol man i save tok pisin

## Pisin Yunivesiti

tasol ol i mekim bikpela wok long haus sik na long ol arapela wok tu i ken go long dispela Yunivesiti.

Sapos ol man long Haus Asembli i lukim dispela pas bilong mi na ol i ting i no stret, orait ol i ken bekim dispela pas bilong mi. Sapos i stret long tingting bilong yupela, orait helpim dispela tingting. Na tokim na kirapim tingting bilong ol arapela.

Iyakae Kope,  
Wapenamanda.

## Ol Meri i Salim Skin

Dia Edita.- Mi lukim planti yangpela meri i salim skin bilong ol long painim mani. Dispela em i wanem samting? Ating yupela ol meri i longlong tru i no gat het na tingting.

Bihain long dai bilong yupela bai yupela i go we? Sapos yupela i laikim tru dispela samting, orait yupela i go na pilai nating tasol, maski long kostim yu yet long mani. Ating yupela i no save wokim mani laka? Sapos yu laik marit, orait yu marit na stap wantaim man bilong yu stret. Maski long go nabaut na pulim ol mani. Traim long wok bai yu kisim mani.

Sapos dispela pasin bilong salim skin i stap moa, bai bihain yumi kisim selp gavman, bai dispela kantri bilong yumi bai i bagarap olgeta. Nau yupela ol meri i mas harim toktok liklik.

Francis Olding,  
Wewak.

Francis Dama,  
Wes Nu Briten.

# Wantaim Moa Baibel Na Takis

Dia Edita.-Planti taim mi lukim, sampela man i pait long niuspepa Wantok bai misin i mas baim takis long gavman. Mi yet mi ting, dispela i kranki tingting. Ating ol man, ol i pait long tok olsem, ol i no save long mining bilong wok misin. Na mi lukim ol waitman yet ol i no pait long toktok olsem; em i tingting bilong ol netif tasol.

Long kantri bilong ol waitman ol i no kikim misin bai em i mas baim takis. Long wanem: em i no putim profit long pocket bilong em. Em i save tilim em i go bek long ol man.

Orait, nau mi laik bekim wanpela pas mi ritim long Wantok Novemba 5 na Oktoba 7. Wanpela meri i tok i stap long Baibel, yumi mas bihainim lo bilong gavman (Ro. 13 1 na 6). Mi tu mi orait long en. Tasol i ken, gavman i mekim lo nogut. Na nau yu ting, mi mas pasim maus long dispela na sindaun na bihainim tasol?

Dispela i no pasin Baibel i skulim yumi long en. Bai yumi no ken pasim maus, sapos yumi luksave, sapos wanpela lo em i nogut. (lukim Ap. 4, 19-20)! Na nau mi ting, dispela lo bai misin i takis long gavman, em i nogut. Yu laik strongim tok bilong yu long Baibel; na yu kolim Mt.17, 24-27. Tasol yu no kisim mining bilong en.

Mining bilong tok bilong Jisas em i olsem: I gat tupela lain man. Wanpela i mas baim takis, narapela i no gat. Na nau yumi laik save, husat i stap long lain namba wan na husat i stap long lain namba tu. Mi ting long lain namba wan gavman i stap, misin i stap na ol narapela

wok em i save helpim kantri bilong yumi na em i no kisim profit. Na dispela lain i no mas takis. Long lain namba tu ol man i stap, ol i save kisim helpim long lain namba wan. Em ol i mas takis.

Jisas yet em i ting, em i no mas baim takis; long wanem em i stap long lain namba wan. Tasol em i baim takis bai ol i no kirap nogut (Mt. 17,27).

Yu no mas strong, bambai misin i takis. Long wanem: Yu tingim taim bilong selp gavman. Dispela taim bai i gat planti Pater, Bruder, Sister bilong yumi yet. Na ol dispela wantok bilong yumi bai ol i kisim mani bilong takis we? Ol i no gat papa na mama na gutpela pren ol i stap long Yurop na ol i ken salim mani i kam. Papa na mama ol i kanaka tasol, ol i no gat mani. Bai ol i takis long wanem? Bai ol i mekim mirakulo olsem Jisas i mekim long kisim mani long bel bilong pis? O bai ol i go long kalabus, bikos ol i nogut mani?

Andreas Devoku,  
Unea Ailan.

## Wantok i Rong

Dia Edita.- Mi wanpela mamba bilong Haus Asembli na tu siaman bilong Niugini Nesenal Pati. Mi lukim niuspepa Wantok i raitim olsem, Niugini Nesenal Pati i laikim selp gavman nau tasol. Em i no tru. Mipela i no tok independens nau tasol. Mipela tok independens bambai. Em i tingting bilong Pati bilong

mi. Mista Thomas Kavali,  
Haus Asembli.



## YUMI REDI YUMI WIN

Wantaim moa Mista Whitlam i bin kam lukluk raun na i go pinis, tasol dispela taim Niugini i no kros tumas long em.

Maski yu no laikim tingting na toktok bilong Mista Whitlam wantaim politikal pati bilong em, lukluk raun bilong em i ken helpim Niugini. Em i ken kirapim sampela nupela aidia.

Pati bilong ol Wokman bilong Australia ( Labor Pati ) i bin toktok planti taim sapos em i winim ileksen long Australia long 1972, bai wan tu em i givim selp gavman long Niugini, na bai independens tu i kam long 1976.

Taim Mista Whitlam i kam lukluk raun long 1970, planti ples na man bilong Niugini i kirap nogut tru long tok bilong em long selp gavman. Tasol nau yumi lukluk i go bek na, tru tu mas, yia 1970 i winim tenpela yia i go pas long en. Long 1970 kantri i go het gut tumas long pasin bilong givim moa strong long ol Niuginian yet insait long Haus Asembli na ol lokal gavman kaunsil tu.

Maski yu no laikim tok bilong Mista Whitlam, nau tasol em i taim bilong kirap redi long selp gavman. Namba wan samting yumi mas lainim na bilipim em hia: selp gavman i kamap moa klostu olgeta de. Olsem mobeta yumi save gut em i wanem samting; nogut em i kamap wan tu na yumi longlong.

Mipela long "Wantok" mipela i ting ol man i mas kisim save long selp gavman em i wanem samting na em i wok olsem wanem. Planti man i no laikim selp gavman bikos ol i no save long en. Tasol yu mas save. Em i kantri bilong yu, em i gavman bilong yu.

Maski selp gavman i klostu, maski em i longwe - yumi mas redi nau. Sapos em i kamap kwiktaim, orait, yumi redi pinis. Sapos em i kamap bihain, orait, yumi redi tu.

# Mista Whitlam Raun Long Teritori

Long wik i go pinis, Mista Gough Whitlam, li-da bilong Pati bilong ol Wokman (Labor Party) bilong Australia, i lusim Niugini i go bek long ples.

Taim em i lukluk raun, Mista Whitlam i autim gen sampela tok em i bin autim pinis taim em i kam long Niugini long yia 1970. Wantaim moa em i tok, sapos pati bilong em i winim ileksen bilong 1972, bai Niugini i kisim selp gavman long 1972 na independens long 1976.

Long Papua dispela ol hetman i bungim Mista Whitlam: Mista Toua Kapena, Mista Ebia Olewale, Mista Albert Maori Kiki na Mista Sere Pitoi. Em i tokim ol:

Bai em i no askim ol pipel long laik bilong ol long selp gavman.

Papua na Nu Gini i mas stap wampela kantri tasol

Ol memba i mas lukautim planti moa Niuginian na Papuan i go insait long ol bisnis long ples bilong ol.


Long Mt. Hagen ol man i no laik harim tok bilong selp gavman. Moa olsem 100 memba bilong Pablik Sevis Asosiesen i bin bung bilong harim Mista Whitlam i autim ol laik bilong pati bilong em. Em i tokim ol, ol i no ken pret na ting bihain long independens bai Australia i tromoi Niugini i stap. Nogat. Bai em i sambai helpim dispela kantri.

Mista Tei Abel, Ministerial Memba bilong ol Wok Didiman na siaman bilong Kompas Pati, i tokim Mista Whitlam, em i samting bilong ol pipel bilong makim taim bilong selp gavman i mas kamap.

Mista Whitlam i tokim 200 hetman bilong ol lain long Mt. Hagen i no gut ol i surikim selp gavman i go bek tumas. Sapos ol i mekim olsem, bai planti tingting i paul nabaut..... olsem tude yumi lukim ol Mataungan long Rabaul i mekim na ol Napidakoe Navitu i makim long Bougainville.



Ol piksa long dispela pec ol i soim Mista Whitlam long ples balus long Rabaul. Klostu 4000 man bilong Mataungan Asosiesen i bungim em long ples balus.





WIL BALUS BILONG

# ANSETT

YU LAIK FLAI LONG WANEM HAP  
ANSETT I HEPI LONG KARIM YU I GO

Ansett I Gat Olkain Balus  
Smok Balus Tri Ensin Tu Ensin Wan Ensin



We're inaugurating new services all the time. Like our new daily services to Kieta (Bougainville). And now we've made application for the right to fly direct to the American-owned island of Guam. Our fleet of modern aircraft has been increased by the addition of the brand new Twin Otter 300 series. Our staff is continually increasing and so are our world-standard facilities. In every way Airlines of Papua-New Guinea is truly representative of the vigorous growth of the Territory. Together, we're really going places.

**ANSETT AIRLINES OF PAPUA NEW GUINEA**  
in conjunction with Ansett Airlines of Australia.

# INSAIT LONG OL POLITIK

(I KAM LONG NEW GUINEA NEWS SERVICE)

## Yumi Mas Yesa Long Independens Kwiktaim Tru

Dokta John Guise, Spika bilong Haus Asembli, i tok Papua na Nu Gini i mas yesa long kisim independens kwiktaim tru.

Dokta Guise i autim dispela tingting bilong em long wanpela brotkas em i bin mekim wantaim ol man bilong B.B.C. Dispela em i kampani bilong mekim ol program long Englan i kamap long redio bilong 50,000,000 manmeri.

Ol man bilong B.B.C. i toktok wantaim Dokta Guise insait long Haus Asembli long de namba 7 bilong Januери. Na ol i mekim sampela piksa tu bilong soim long wanpela redio i save bringim piksa wantaim toktok, em ol i kolim televisen.

### YUMI RABIS TRU

Dokta Guise i tokim ol man bilong B.B.C. na ol Englan, dispela kantri bilong yumi i rabis tru. Olgeta arapela kantri bilong graun i winim yumi tru long ol rot na bris na skul na haus na balus na sip na planti arapela samting yet.

Na olgeta yia kantri bilong yumi i mas kisim planti mani moa long Australia (long yia 1970 yumi bin kisim \$140,000,000. Dokta Guise i tok, dispela samting i tru, tasol yumi ol Papua na Nu Gini i mas kirapim pasin bilong bosim yumi yet na helpim yumi yet.

Em i skruim tok olsem: "Olgeta man bilong graun i mas gat strong bilong lukautim em yet na bosim em yet sapos em i laik. Mi ting Pati bilong ol Wokman bilong Australia (Labor Party) i tok stret, taim em i promisim selp gavman long yia 1972 na independens long yia 1976".

### SELP GAVMAN I MIN

Selp gavman i min ol memba bilong Haus Asembli na sampela arapela hetman bai i bosim ol mani na skul na haus na rot na bris na ples balus long dispela kantri. Olgeta yia ol bai i mas painim olgeta mani bilong mekim dispela wok na ol i mas lukaut bai ol samting long kantri i ran gut. Long dispela taim bilong selp gavman, Australia bai i holim yet ol wok bilong bosim ol ami na balus na toktok wantaim ol arapela kantri.

### INDEPENDENS I MIN

Independens long yia 1976 i min olsem: ol memba bilong Haus Asembli na ol hetman bilong nupela kantri i kisim olgeta wok bilong bosim dispela kantri.

Dokta Guise i tokim ol dispela man bilong B.B.C. em i save planti pipel tumas bilong Papua na Nu Gini i no laikim dispela tingting bilong selp gavman i kamap long 1972 na independens long 1976. Ol i pret yumi no gat inap save yet long ranim dispela kantri.

### PRET LONG HATWOK

Tasol Dokta Guise i tok em i no wanbel wantaim ol man i gat dispe-

la tingting. Nogat. Em i laik yumi stat nau tasol. Em i tok planti man tumas i seksek i pret long ol hatwok yumi mas mekim. Maski long skirapim planti toktok, yumi kirap traim. Yumi inap.

Dokta Guise i tok tu, em i ting kain gavman yumi gat nau i no inap wok gut bihain long independens. Em kain gavman hia yumi kolim gavman Wesminsta. Em i samting bilong Englan. Gavman Wesminsta i wok olsem: Ol pipel i ilektim ol memba bilong Haus Asembli. Orait, nau ol memba yet i kirap makim wanpela wanpela wanwok bilong ol olsem ministerial memba. Ol ministerial memba hia i ranim gavman na kantri. Man i no memba i no ken insait long gavman.

### GAVMAN PRESIDEN

Dokta Guise i tok em i no laikim dispela kain gavman. Em i laikim narapela kain, em ol i kolim gavman Presiden. Em i gavman bilong Amerika. Long dispela kain gavman Presiden ol memba bilong politikal pati i winim ileksen i ranim kantri. Tasol ol i ken singautim sampela arapela saveman tu bilong helpim ol. Ol dispela man i no mas memba bilong Haus Asembli, ol i no mas man bilong politik, na ol pipel i no mas ilektim ol. Nogat gavman i ken singautim ol long wok bikos ol i gat planti save. Em tasol.

Long gavman Presiden, presiden yet em i hetman



Dokta Guise

bilong kantri na em i gat planti strong. Toktok bilong olgeta memba wantaim i no inap daunim em; ol i no ken rausim em tu inap long 4-pela yia.

### MANI LONG JAPAN

Dokta Guise i tokim ol man bilong B.B.C. bilong London, Australia i mas redi long givim planti man long Papua na Nu Gini bihain tupela i kisim independens. Sapos nogat, bai yumi mas painim mani long sampela arapela kantri olsem Japan, Indonesia, na Saina.

(Australia i no laik harim kain tok olsem, long wanem sampela kantri olsem Saina i birua bilong Australia na Australia i pret bai em i grisim Niugini na bihain mekim nogut long en na long Australia wantaim.)

Dokta Guise i tok tu, bihain long independens em i ting yumi ol Papua na Nu Gini bai laik mekim moa pren long ol braunskin i wansolwara bilong yumi, em ol i stap long kantri Indonesia, na Filipin Ailan, na Singapor, na Malaysia.

# Mak Antap Tru

Em i namba wan taim tupela man na tupela meri bilong Niugini i winim setifiket bilong lukaut-im tit. Tisa bilong ol i sindaun namel.



Em hia nem bilong ol sumatin i winim olgeta arapela long Skul Setifiket long 1970.

Blaise Mem (Mongop High School) Raphael Moge (Fatima High School) Robert Gray (Alotau High School), Junilyn Galo (Kambubu Adventist High School), Hubert Auki (De la Salle High School), Benjamin Umba (Rosary College), Sue Matheson (Goroka High School), Douglas Pikacha (Kambubu Adventist High School), Siroval Tito (Madina High School), Thomas Willie (De la Salle High School), Selan Polum (Manus High School), Tek Sitapai (Manus High School), Katunane Sorewe (Asaroka High School), Simon Austrai (Kambubu Adventist High School), Peter Sam (Iarowari High School).

Wanpela man bilong ol kaunsil i sanap namel na i toktok long ol pipel long Kerovil long Westen Hailans Distrik.



Olgeta tok  
i stap long dispela niuspepa  
ol i bin paitim pastaim  
long wanpela masin bilong rait.  
nem bilong em . . .

# Olympia

TERRITORY AGENTS

## BRECKWOLDT & CO. (N.G.) PTY. LTD.

PORT MORESBY  
P.O. Box 1549, Boroko.

MADANG  
P.O. Box 185.


LAE  
P.O. Box 557.

RABAUL  
P.O. Box 222.


MT HAGEN  
P.O. Box 237.

WEWAK  
P.O. Box 178.

KIETA  
P.O. Box 72.







(D.I.E.S. i orait mipela kisim dispela piksa bilong graun.)

# Klap bilong ol yangpela fama

(I KAM LONG MARGARET FITZGERALD)

Dispela kantri i mas gat wanpela klap bilong ol yangpela fama. Fama em i man i mekim kain kain wok didiman.

Sampela man i ting long kamapim wanpela Asosiesen bilong ol Yangpela Fama. Ol i laik dispela Asosiesen i gat dispela ol wok:

1.) Mekim bai ol yangpela pipel i laikim wok didiman.

2.) Skulim ol yangpela pipel long ol samting bilong wok gaden, wok bulmakau, wok timba, na wok long lukautim pis.

3.) Bungim olgeta yangpela pipel bilong Teritori i gat dispela kain laik. Mekim wanpela so o resis olgeta yia bilong givim prais long ol gutpela wok didiman.

4.) Bungim olgeta fama bilong Teritori wantaim ol wantok bilong ol i stap long Fiji, long Solomon Ailan, na long ol arapela ailan bilong Pasifik.

Dokta John Guise, spika bilong Haus Asembli, i bin mekim dispela tok i go long ol i tingting long kamapim YF (Yangpela Fama) Klap: "Papua na Nu Gini i kantri bilong wok gaden. Em i as wok

bilong yumi. Yumi mas kamapim hariap tru dispela kain Yangpela Fama Klap, bai ol yangpela pipel bilong yumi i laikim tru graun bilong yumi, na olkain tri na sayor na ol samting i kamap long graun. Ol i mas lainim amamas long ol dispela samting. Ol dispela samting i ken mekim kantri bilong yumi i win moa.

"Yumi mas hariap; yumi no ken wet. I gat planti sumatin tumas i lusim skul long standet sikis na bipo yet. Dispela ol man i mas gat wok. Yumi no ken tromoim ol; nogut bai ol i trabelman tasol na i kirap mekim save long ol arapela man. Mi laikim olkain klap na asosiesen i traime helpim ol dispela sumatin i tarangu tru. Ol yet i laik wok; tasol i no gat inap wok long ol". Em tasol tok bilong Dokta Guise.

Long planti hap bilong Teritori i gat sampela tisa na developmen ofisa i mekim gutpela wok tru long helpim ol yangpela pipel long hap bilong ol. Em i gutpela. Tasol mipela i ting mobeta yumi gat wanpela bikpela

asosiesen o klap i ken bungim save bilong olgeta dispela gutpela manmeri. Olsem tu bai gavman i ken lukim na wokim sampela buk na skul moa bilong mekim go het wok didiman bilong dispela Teritori.

Mipela i ting tu ol skul i mas lainim ol sumatin moa yet long ol samting bilong graun: ol sayor bilong gaden, ol pasin bilong wok gaden, bulmakau, ol save bilong tri. Long dispela kantri yumi man tru bilong graun. Olsem wanem man i lusim dispela tingting long skul bilong yumi?

Inap nau ol ofisa bilong gavman long dipatmen bilong didiman, edukesen, na Rural Development ol i mekim gutpela tok. Tasol planti i no insait tru long wok; ol i no laik promisim mani na saveman bilong helpim dispela wok. Ol lokal gavman kaunsil tu i no ting planti long dispela samting yet.

Mobeta wanpela wanpela tisa i helpim ol sumatin bilong ol na wokim sampela gaden na arakain wok didiman nabaut long skul bilong ol bai ol arapela manki i ken lukim. Sampela tisa i bin mekim olsem na ol skulboi i amamas tru.

Sapos sampela tisa o manmeri nating i laikim dispela tingting long Klap bilong Ol Yangpela Fama, ol i ken rait i kam long mi:

Margaret Fitzgerald,  
WANTOK  
P.O. Box 298  
Wewak.

Minista bilong ol Teritori, Mista Barnes i amamas tru long lukim wok ol i mekim long rot i lusim Mendi i go long Ialibu. Em i lukim gut dispela rot taim em i flai i go long Kerema inap Mendi.

## PE i GO ANTAP

Long Desemba Administreta Mista Johnson i bin tok se, Minista bilong ol Teritori, Mista C.E. Barnes i bin tok orait long pe bilong ol Ministerial na nambatu Ministerial Memba i go antap.

Ol man i stap long Ministerial ofis bai i kisim \$1,000 moa long wanpela yia. Dispela i bin stat long 21 de bilong August 1970. Dispela bai mekim pe bilong ol Ministerial Memba i go inap \$6,000 na nambatu Ministerial Memba i go inap long \$4,750.

Man i maus long Kaunsil bilong nambawan gavman, Mista Tom Leahy, bai i kisim wankain pe olsem ol Ministerial Memba.

Minista i bin tok orait long ol nambatu Ministerial Memba i gat ofis na i gat kuskus long hap bilong ol. Long dispela gavman i ken givim \$1300 moa long ol.

Ol Ministerial Memba yet i gat pinis ol ka wantaim laisens, ofis, na ol kuskus.

## Ol Kaunsila Lukim Wok

Bougainville Kopa Kampani i laik soim long ol man bilong Niugini, graun bilong yumi i gat wanem ol kain gutsamting i stap insait long en. Olsem Kampani yet i baim rot long wanpela lain lokal gavman kaunsil i kam lukluk raun na lukim ol wok bilong Kopa Kampani.

Namba tu Ministerial Memba bilong Lokal Gavman, Mista Kaibelt Diria, i tok 35 kaunsila bilong olgeta distrik i bin kam lukim wok.

Kampani tu i laik bai ol pipel bilong Papua na Nu Gini i putim sampela mani i go insait long ol dispela bikpela bisnis.

**WEWAK  
CHRISTIAN  
BOOKSHOP**



**KISIM SAVE**

A COMPLETE STUDENTS KITSET


OL BUK BILONG KISIM SAVE LONG RIT NA RAIT LONG TOK PISIN, WANTAIM PEPA BILONG RAIT NA PENSIL. \$1.00 TASOL.

Oda long **WEWAK CHRISTIAN BOOKSHOP**

Box 169. Wewak.

Quantity discount available.

# SKUL LIVA



Yes, ol wantok, nupela skul yia i kamap pinis. Yumi olgeta man i wok nau long redim ol samting bilong nupela yia. Ol papamama, brata, kanderere, i lukautim skul takis bilong pikinini bilong ol. Ol sumatin i lukautim nupela dres, kes samting bilong go bek gen long skul.

Tasol i gat bikpela lain sumatin ol i pinis long skul. Ol i no winim tru skul, tasol edukesen i tok, "Yupela pinis nau. Yupela i no ken kam bek moa long skul. Yupela go bek long ples." Long 1970 i gat 12,000 yangpela man na meri i pinis long praimari skul na ol haiskul i no inap long ol. Ol i gat standet 6. Tasol ol i no ken skul moa.

Bai ol dispela lain manki i mekim wanem? Mi pilim planti ol i tingting olsem: mi lus pinis. Mi rabis nating. Mi no inap mekim wanpela samting. Bai mi slip nating long ples, o mi go stap wantaim brata bilong mi long taun na mi stap nating. Tru tumas mi tokim yupela, i gat planti sumatin i gat tingting olsem. Tasol mi wari tru long dispela kain manki. Bilong wanem ol i laik westim ol gutpela save na skul ol i kisim pinis? I no gat rot bilong ol bilong helpim ol pipel na kantri? Olsem wanem?

Mipela hia long YC i ting olsem: i gat rot. I gat fopela rot ol liva i ken bihainim sapos ol i laik helpim pipel bilong ol. Em hia.

(1) Helpim papa o brata kirapim bisnis long ples.

I olsem; sindaun tok-tok wantaim papa o brata. Kisim hap graun bilong famili bilong yu i stap nating na tokim

papa. "Mi laik stat nau long wokim bisnis bilong mi." Tasol pastaim yu mas pilim tru, wanem kain bisnis i gutpela tru long wokim: bisnis long kopra, bisnis long kopi, bisnis long kakaruk o pig, bisnis long buai.

Painim pinis, nau yu mas stat long kirapim bisnis. Yu no wet na tok bihain, bihain. Tingting long dispela samting:

yu maniman tru. Yu gat graun. Wokim graun bai yu gat mani. Graun i olsem mani. Man i gat graun i maniman tru.

(2) Bihain wanpela Adalt Edukesen kos.

Gavman i gat planti kain kain kos bilong helpim ol bikpela man kisim kain kain save. Ol dispela kos ol i kolim "Adult Education Course". Makim wanpela yu pilim i gutpela bilong helpim yu na go putim nem bilong yu long ofis.

(3) Helpim het tisa long skul.

Go long skul na askim het tisa, "Mi ken helpim yu liklik tu long skul o nogat? Mi gat save na

sapos yu sot long man bilong mekim wanpela wok, orait mi ken helpim yu." Tasol yu mas tokim PCA long aidia bilong yu pastaim, na ol PCA i ken baim yu sapos ol i laik.

(4) Helpim kaunsil

Go long kaunsil ofis na askim ol, "Mi inap helpim yupela long wanpela wok tu o nogat? Mi pinisim standet 6 na mi inap mekim sampela wok bilong helpim yupela tu. Nogut wok i stap na i no gut wanpela man bilong mekim."

Olsem wanem? Yupela ol standet 6 i ting wanem long ol aidia bilong mipela YC? I gutpela tu o nogat?

## MIPELA BILONG NAMASU!



*MI WAREO—Mi bin lukautim benk bilong NAMASU long 10-pela yia.*

*MI KATE—Mi save paitim masin long NAMASU ofis.*

*MI CHIMBU—Mi namba tri yia "Klerikal Aprentis." Mi skul olgeta long bisnis.*

*MI AUSTRALIA—Mi save raun long lukautim olgeta stoa bilong NAMASU.*

*MI SALAMAUA—Mi Kepten bilong sip. Mi bin wok wantaim NAMASU long 10-pela yia tu.*

### ATING YU TU I LAIK WOK WANTAIM



KRISTEN PRES i wokim kain kain buk bilong strongim bilip na bilong sanapim gutpela pasin na sindaun na bel isi bilong ol manmeri na ol pikinini.

*Nau yu ken baim dispela buk:*

## Pasin Bilong Kristen Mama

*Em i soim wok bilong ol mama long lukautim haus na kaikai na klinpasin na pilai bilong ol pikinini na gutpela rot bilong prea na song na amamas*

Salim oda i go long:



### KRISTEN PRES

Sales Division  
The Christian Book Centre  
Box 222, Madang

## OLGETA KAIN KAIN SEL

BILONG SIP, TRAK, PLANTESIN  
O HAUS I GO ANTAP LONG HAP KA

## MIPELA SAVE WOKIM GUT

Mipela save wokim gut sel long olgeta kain kain laplap. Ol i nambawan kain laplap bilong sanap strong long san i hat na bikpela ren long dispela kantri hia. Laplap hia ol i kolim katen, o kanis, o nailon. Sapos yu laik askim sel i kostim hamas, yu mas raitim pas i kam long mipela stret na toksave long wanem kain sel yu laik, na bikpela bilong em. Na mipela bekim pas i kam bek stret long yu. Ating ol kepten bilong ol smolpela sip i save pinis long mipela. Faktori bilong mipela i save tumas long wokim planti sel moa bilong ol. Yu rait long mipela pastaim!

\* MI KEN SALIM I GO INSAIT LONG 24 AUA

\* SALIM I GO LONG OLGETA HAP PLES

## CANVAS & CORDAGE PTY. LTD.

AH CHEE AV., RABAU.

P.O. BOX 476

PHONE 2008.

## HELT

Las taim mi bin toktok long sik ti bi. Em i ken pinis sapos yumi kisim marasin olgeta taim. Sapos yumi no go kwiktaim kisim marasin bai ol arapela man long ples i kisim dispela sik na ol i dai tu. Yumi mas save gut sapos yumi kus olgeta taim, pilim tait, na yumi kisim tuhat long nait, orait, yumi mas go na lukim dokta, painimaut sik bilong yumi. Nogut em i ti bi.

Kain sik olsem malaria na ti bi i no inap long karim kantri i go bikpela. Wanpela kantri i ken kamap bikpela sapos olgeta man i bung na wok wantaim dokta, doktaboi, na ol nes.

Sampela lokal Gavman Kaunsil i wokim haus sik na etpos. Tasol ol man i no save helpim ol long mekim wok. Ol i save tok; "Yumi baim takis pinis. Em inap". Nogat; em i no inap. Dispela ol wok bilong kaunsil i save laikim planti mani moa.

Sampela kaunsil i baim ol doktaboi yet, na ol i laikim ol dispela doktaboi i mas i go raun long olgeta ples, na tokim ol pipel long pasin bilong stapim sik. Doktaboi i no bilong givim marasin tasol, em i mas traim long stapim sik pastaim. Tasol yumi mas wok wantaim na helpim. Olsem wanem bai yumi ken stapim malaria sapos yumi pasim dua long haus na ol malaria tim i no ken kam insait? Yumi no inap long stapim sik pekpek wara sapos yumi larim ol lang na pik i stap nabaut long ples. Doktaboi i mas mekim ol dispela wok. Em i mas mekim yumi lukautim ples bilong yumi bai i stap klin.

Sampela man i save kros long doktaboi long wanem em i no opim haus sik bilong em long olgeta de. Ol i tok: "Em i stap hia bilong givim yumi marasin; em i wok

bilong em. Na watpo em i mekim olsem?" Nogat; em yumi rong tru. Sapos dokta i stap long haus sik tasol, olsem wanem bai em i ken go na lukim ol man long arapela viles? Nogat. Namba wan wok bilong doktaboi em i bilong stapim sik, i no bilong mekim i orait. Em namba tu tasol. Yumi mas helpim em. Em wanpela i no inap.


Sampela kaunsil i traim long mekim hul wara long ples tasol ol man i no laik helpim. Morota bilong haus sik i bruk na ol i no putim bek nupela. Na ol tu ol i no save klinim rot. Ol i laik kisim nating ol gutpela santing.

Ol pikinini i go longwe long skul na bringim bek ol nupela tingting. I gutpela. Tasol yumi papamama i save tokim ol Yupela i yangpela tumas, yupela i no inap long skulim mipela. Mipela i gat pasin bilong bipo. I orait, yumi ken holim ol gutpela pasin bilong bipo, tasol yumi mas bungim wanpela nupela pasin i gutpela. Olsem baimbai yumi ken kisim gutpela sindaun, na wok bilong yumi bai i go isi.

Olsem yumi mas wok wantaim ol dokta, doktaboi, na ol nes. Ol i helpim yumi long mekim Niugini i wanpela gutpela kantri.

**YANGORU** Kaunsila Yabai i tok ol lain bilong em i no bikhet long wok long ol rot santing, nogat. Ol i wari long ol kokonas na haus na narapela santing Pablik Woks Dipatmen i bin sutim daun taim ol i wokim rot namba wan taim...na ol i no bin stretim gut dispela rot na planti mani bilong kaunsil i lus nating long dispela rot.

**PORT MORESBY** I no longtaim wanpela Niuginian i kamap olsem pailot. Man hia bilong Noten Distrik. Nem bilong em Barry Awui. Ol blakskin pailot nau i tripela.



## ISRAEL

It is still near the Christmas season. At Christmas time the whole Christian world turns to one country in the world and that is Palestine. Why? Because Christ was born in a town there, called Bethlehem. Today Palestine is known as Israel.

Nowadays hardly a week goes by in which we do not hear something in the news about Israel. So it is good to recall a few things about this country which influenced more countries in the world than any other. And still, it is a small country. Even today it has only about 3,000,000 people. Some cities in the world have three times that many.

The name Israel comes from way back in the Old Testament; it was a second name of Abraham's grandson Jacob. Today the people living there call themselves Israelis. But most of the people in the world refer to them as Jews. The word Jew comes from the name of one of the twelve tribes of Israel, the one called Judah.

For hundreds of years Israel had been ruled by someone else than the Jews. Most Jews left. Then about 1917 many who called themselves Zionists began to come back

because many countries were treating Jews very badly. Gradually the idea of again having a country all their own began to inspire more and more Jews to go back to what was then Palestine, a land protected by the British.

After the second World War even more Jews came in. But most Jews still do not live in Israel. Most are in the United States.

Jews always consider theirs a holy land, a land given them by God in the Old Testament, a land where the Redeemer will one day appear. They do not believe Christ was the Redeemer and so are still waiting for one to come.

In May 1948, the United Nations asked Britain to move out of Palestine and thus it became independent. Ever since then various Arab states surrounding it have tried and tried to destroy it. In June 1968 five big Arab countries started a war against Israel but in six days it was all over. Israel had won.

Jews are very hard workers and good students. With business and money you cannot beat them. They have made a desert feed them. A few of them would give a good example to Niugini.



## BETTER PREPARE

Once again Mr. Whitlam has come and gone, but this time he has not left such an outraged Niugini.

Whether one agrees or not with the policies of Mr. Whitlam and his Australian Labor Party, his visit can help Niugini. It can give rise to many new ideas.

The Australian Labor Party has now stated many times that if it wins the elections in Australia in 1972, it will begin proceedings for immediate self government in Niugini and for independence in 1976.

When Mr. Whitlam visited us in 1970, he shocked and upset many village people with his statements on self government. And yet if we look back now, we see that the year 1970 saw more political advancement than the ten years before it. The year 1970 saw more power going to indigenous members of the House of Assembly, to ministerial members, and to the local government councils.

Whether one agrees with Mr. Whitlam or not, now is definitely the time to start preparing for self government, and perhaps the first thing to be aware of is that it is coming nearer each day. The least that one can do is know what it is all about. Too many people still do not.

We of "Wantok" believe that everyone must learn what self government is all about and how it works. Many are against it because they do not understand it. But you must understand. It is your country; it is your government.

It is either now or never. If you are ready and self government comes, so much the better. If you are ready and it is delayed, you still have lost nothing. So start preparing now.

## ATING YU SAVE



Teddy  
Ganau  
i raitim

**NU AILAN.** Memba bilong Haus Asembli bilong Namatanai, Mista Julius Chan, i kros na i tok ol niuspepa na redio stesin i mekim ol tok politik tasol, na i no gat inap nius long ol bisnis developmen.

**PORT MORESBY.** Samting olsem 200 yangpela man i kam long olgeta distrik long Teritori, i bin statim trening bilong ami long Goldie Riva.

**URIMO** Sikispela ten Niuginian bilong Morobe, Madang, Is na Wes Sepik bai i mekim wan yia trening long kamap fama long Urimo Didiman Stesin. Dispela em i namba wan taim bilong ol long kisim dispela trening long Urimo.

**PORT MORESBY.** Ministerial Memba bilong ol skul, Mista Mathias Toliman i telimautim nem bilong ol sikispela sumatin. bai i go long haiskul long Australia. Em hia nem bilong ol: Thomas Willie (Sentral Distrik), Quanade Iagogo (Isten Hailans), Kevin Kaidoga and Gerry Tokilivila (Milne Bay), Peter Navus (Is Nu Briten), Jim Longbut (Nu Ailan).

**MT. HAGEN** Mista Leonis Tarau bilong Is Nu Briten i wok nau long Pablik Woks Dipatmen long Mendi nau bai i lusim Mendi i go long wanpela kos long Sidni.

**RASIA** I bin sutim wanpela balus i no gat man i go kamap long Venus. Venus em i wanpela bikpela sta stap klostu long san. Em i ran 120 de inap kamap long sta Venus.

**KANBERA.** Man bilong Kwin Duk bilong Edinboro bai i kam lukim Niugini long mun Mas. Em bai i go lukluk raun long Port Moresby, Madang, na Kieta. Bihain bai em i go long Australia na sampela arapela kantri i stap long Pasifik.

**BAYER RIVA:** Enga Enterprise Co-operative Limited i bin statim wanpela nupela kain fam bilong lukautim sipsip. Ol i kisim 6-pela sipsip pinis long Baptis Misin.

**VANIMO** Dipatmen bilong lukautim Bus i lukim ol diwai long hap bilong Vanimo, na i painim olsem ol i gutpela long wokim pepa. Mista McIntosh, hetman bilong dipatmen, i tok diwai bilong Niugini i gutpela long wokim pepa na i wankain long ol diwai long Australia.

Albert  
Singer  
i raitim



**ALOTAU** Wok bilong nupela redio stesin bilong gavman. bai i stat bihain long sampela mun long Alotau long Milne Bay Distrik.

**PORT MORESBY** Papua na Nu Gini Developmen Beng i makim 5-pela Niuginian, bilong kisim trening na kamap namba tu hetman bilong Distrik Developmen Beng. Dispela em i namba wan taim Developmen Beng i makim sampela Niuginian. Em hia nem bilong ol: Matthew Siune (Kundiawa), Matine Kamung (Finschhafen), Tau Vere (Papua), Matthew Ethraim (Rabaul), na Dennis Plinduo (Wewak).

**MANUS:** Ol i ilektim 33 nupela kaunsila hia, Dispela kaunsil i lukautim samting olsem 21,000 manmeri.

NAMBA WAN STUA LONG PAPUA NA NEW GUINEA BILONG BAIM GUTPELA KAIKAI NA OLGETA KAIN SAMTING. TAIM YU LAIK GO LONG STUA...YU GO LONG STUA BILONG CARPENTERS

**PORT MORESBY . MADANG RABAU LAE**

# kaunsil nius

**IALIBU:** Kaunsil hia i bin givim \$50,00 long ol sikman i stap long haus sik bilong ol lepraman long Togoba. Em i bilong helpim ol sikman yet kirapim liklik bisnis bilong ol. Inap nau ol i gat bisnis bilong luk-autim ol paul na pis.

**ASARO WATABUNG:** Kaunsil hia i wok long tri-pela rot na i gat 30 wokman, 2-pela Izuzu trak, 2-pela trakta wantaim trela. Dispela kaunsil i bin kisim \$3.00 long helpim ol long wokim ol rot na bris.

**MT. HAGEN:** Kaunsil hia i strong bai gavman i mas wokim wanpela haiskul long Wabag na wanpela teknikal skul long Hagen stret. Ol i wari bikos 4-pela sumatin tasol bilong ol i pinisim standet 6 i bin go long haiskul.

**DEI:** Kaunsil hia i laikim Open Elektroet bilong ol stret long wanem ol i gat 18,000 pipel long hap bilong ol na ol tu i no ken wok gat wantaim ol man bilong Mui.

**PORT MORESBY:** Namba wan gavman, Mista Johnson, i bin tok ol 147 kaunsil long Teritori i bin bungim \$2,253,802 dola long ol takis mani. Em i tok amamas long ol.

**TIKANA/KABIENG:** Ol kaunsila i raun nabaut kibung wantaim ol pipel long 13 ples, bilong tokim ol long kain kain wok ol i laik mekim dispela yia.

**HUON:** Kaunsil hia i bin baim ol diwai kapa simeh samting inap \$2,500 bilong wokim tupela bikpela rum long tupela skul bilong Luteran Misin long Gabmazung na Buka-ua.

**BAMU RIVA:** Moa olsem 5000 pipel bilong dispela hap i laikim lokal gavman kaunsil bilong ol stret.

**PLANTI KAUNSI I KISIM MANI BILONG WOKIM ROT:**

**ASARO/WATABUNG:** i kisim \$2,500.

**GOROKA:** i kisim \$7,000

**LUFU/KARIMI:** i kisim \$4,000.

**OKAPA:** i kisim \$5,300.

**KAINANTU:** i kisim \$2,000.

## KLASIFAIT

### PABLIK NOTIS

**WINIM HANWAS.** Ritim 1 Korin sapta 15 na raitim stori inap long 500 wot (words) long "kirap bek". Stori i mas kamap bipo long 30 Novemba 1971. Adres: Booklet Box 1096, Boroko.

Wantok Publications,  
P.O. Box 298, Wewak, i wokim, na Wirui Pres long Wewak i prinim.

## Planti pipol oli askim

Tutt Bryant emi gat wonem samting long stoa bilong ol.

Emi gat planti kain masin nau sperpat long en tu. Nau hia yu lukim sampela mipela igat long stoa long mipela. Sapos yu laikim arapela samting bai yu askim long stoa long mipela long wonem TUTT BRYANT igat planti samting long ol masin, moto nau arapela samting. Em hia mi kolim sampela tasol mipela.

ALLIS CHALMERS <i>(earth moving equipment)</i>	LIGHTBURN <i>(cement mixers)</i>
APAC <i>(lift gear)</i>	LINCOLN WELDERS
AVIS RENT-A-CAR	KAWASAKI OUTBOARDS
BEDFORD <i>(trucks)</i>	KITTEN <i>(automotive products)</i>
BROOMWADE COMPRESSORS	MERCURY OUTBOARDS
CARIBBEAN BOATS	MICHIGAN LOADERS
DIHATSU	MONROE-WYLIE AUTOPARTS
DUFFIELD HOSES	ONAN <i>(engines and generator sets)</i>
EQUIPMENT INVESTMENTS <i>(hire purchasing and leasing facilities)</i>	PACIFIC-ACE EQUIPMENT
FIAT TRACTORS	PACIFIC PUMPS
FIRESTONE TYRES	P.E.P. <i>(automotive products)</i>
GENERAL MOTORS HOLDEN	PERKINS DIESEL
GENERAL MOTORS <i>(diesel)</i>	PHOENIX ASSURANCE
HEALTHWAYS DIVING EQUIPMENT	SMITH'S INSTRUMENT
HOWARD <i>(Agricultural)</i>	SUZUKI MOTOR CYCLES
I.S.S. <i>(safety equipment)</i>	VOLVO-PENTA <i>(marine engines)</i>
	YANMAR DIESEL
	YOKOHAMA TYRES



Tutu Bryant Pacific Limited

BRANCHES: PORT MORESBY, LAE, GOROKA, MADANG, RABAU, KIETA  
AGENTS: MT. HAGEN, WEWAK, HONIARA (BRITISH SOLOMONS)  
WRITE: P.O. BOX 326, PORT MORESBY, T.P.N.G.

## Laik Rausim Minista

Long kibung bilong en long Mt. Hagen Lokal Gavman Asosiesen i tok em i laik bai ol i teke-we wok bilong Namba tu Ministerial Memba bilong Lokal Gavman. Man bilong holim dispela wok nau, em Mista Kaibelt Diria bilong Waghi Open.

Asosiesen i tok i no gat wok bilong kain Ministerial Memba olsem bikos i no gat Dipatmen bilong Lokal Gavman. Bai em i bosim wanem samting? Asosiesen i strong gavman i mas kamapim wanpela dipatmen bilong Lokal Gavman stret. Inap nau wanpela Dipatmen bilong ol kiap aninit long Dipatmen bilong Administreta i bosim ol lokal gavman kaunsil.



Overseas rates on application.

Sapos mipela i salim i kam long balus:

7 pela taim i kostim	\$1.00
14 pela taim i kostim	\$2.00
21 pela taim i kostim	\$3.00
28 pela taim i kostim	\$4.00

Wantok Publications Inc.,  
P.O. Box 298, Wewak

### ADVERTISING RATES

Casual \$2.00 per single column inch.	
3 insertions over 12 months	\$1.85
6 insertions over 12 months	\$1.70
12 insertions over 12 months	\$1.55
24 insertions over 12 months	\$1.40
Classified Advertising: 65 cents first 2 lines; 30 cents each additional line.	

Published 1st and 3rd Wednesday of the month.



*Ol lain skul ami bilong Australia na Niugini i malolo long kem long Lae. Sampela bilong Australia i kam long Niugini na sampela bilong Niugini i go long Australia.*

# TU DOLA

**Sapos yu salim \$2 (tu dola)**

**i kam long mipela**

**bai mipela i salim niuspepa WANTOK**

**i go 14 pela taim long yu.**

Sapos yu laik kisim niuspepa WANTOK yu mas salim dispela hap niuspepa i kam bek wantaim \$2 (tu dola).

Adres bilong mipela em hia:  
WANTOK PUBLICATIONS  
INC.,  
P.O. BOX 298, WEWAK.

NEM BILONG YU HIA:

---

ADRES BILONG YU HIA:

---



---